





# **Акафист**

## **святому преподобному**

## **Мартирию, Зеленецкому**

## **чудотворцу**

---

### **Кондак 1**

Избранниче благодати Божией, преподобне отче наш Мартирие, от юности твоея Христа возлюбил еси и Тому невозвратно последовал еси. Обитель Зеленецкую создав, в той многия к спасению управил еси. Чудесы украсився в житии, в маститей старости преставился еси и, днесь на Небесех ликующе выну молишися за ны. Мы же, светло память тою празднующе, тако тя величаем:

Радуйся, Мартирие, скорый наш помощник,  
Зеленецкий чудотворче!

### **Икос 1**

Ангели и Архангели и вся Воинства Небесная Христа песнями превозносят. Сим же и души праведник совершенных сликовствуют, в их же

ли́це тѣ зря́ще, та́ко хва́лим досто́йно, на́шего засту́пника:

Ра́дуйся, от ю́ности Небе́снаго оте́чества взыска́вый; ра́дуйся, вся́ ми́ра сего́ кра́сная ни во что́ же вмени́вый.

Ра́дуйся, Христо́ви еди́ному послужи́вый; ра́дуйся, сего́ ра́ди крѣст жити́я ино́ческаго прие́мый.

Ра́дуйся, оби́тель Зеле́нецкую устро́ивый; ра́дуйся, созда́вый ино́ком вита́лище безпеча́льное.

Ра́дуйся, бра́тии ра́ди мно́ги труды́ претерпе́вый; ра́дуйся, ещѣ́ в жити́и чуде́сы от Бо́га просла́вленный.

Ра́дуйся, царѣ́вича от сме́ртнаго одра́ воздвигну́вый; ра́дуйся, в жити́и явле́ния Ма́тере Бо́жия удосто́енный.

Ра́дуйся, ли́ку пра́ведных вчинѣ́нный.

Ра́дуйся, Марти́рие, ско́рый на́ш помо́щниче, Зеле́нецкий чудотво́рче!

## **Конда́к 2**

Ви́дел еси́, преподо́бне Марти́рие, сме́рть роди́телей твои́х, и от сего́ ещѣ́ в мла́дости позна́л еси́, я́ко страна́ники и пришельцы́ есмы́ в

юдóли сéй земно́й. Мо́ре же житéйское зря́  
напа́стей, бу́рею воздвига́емое, к тíхому  
приста́нищу устремíлся еси́. В це́рковь бо, я́ко в  
кора́бль, прите́кл еси́ и Небе́сным Ко́рмчим  
Христо́м в селéния го́рняя управлен бы́л еси́,  
иде́же днёсь ра́достно вопиéши Бо́гови:  
Аллилу́иа!

## И́кос 2

Уразумéл еси́ пути́ спаси́тельныя, о́тче наш  
Марти́рие, егда́, иере́я Благовéщенския це́ркве  
Бориса посещáя, поучéниям его́ внимáл еси́. И,  
тому́ послéдовав, в Великолу́цкую оби́тель  
Сéргиеву пресели́лся еси́ и вся́ ино́ческаго  
жити́я тяготы́ понéсл еси́. Тёмже тако́ ти рцём:

Ра́дуйся, Вели́ких Лу́к произра́стание дивное;  
ра́дуйся, сирото́, сохранéнное Бо́гом от напа́стей  
вся́ческих.

Ра́дуйся, я́ко посла́ ти́ Госпо́дь родите́ля но́ва  
иере́я пра́ведна; ра́дуйся, я́ко любóвию то́й  
благóму игу́ Христо́ву ты́ покори́.

Ра́дуйся, сла́дце послу́шавый то́го от писáния  
назидáния; ра́дуйся, ча́сто входивый в хра́м  
Благовéщения Пречи́стыя.

Ра́дуйся, моли́твою та́мо умудря́вайся;  
ра́дуйся, прия́тием Пречи́стых Та́ин  
укрепля́вайся.

Ра́дуйся, проче́е дня́ проводи́вый в трудёх  
вся́ческих; ра́дуйся, целому́дрие душе́вное и  
телёсное неруши́мо соблюди́й.

Ра́дуйся, досто́йно на по́двиг ино́ческаго  
жити́я вше́дый во оби́тель Великолу́цкую.

Ра́дуйся, Марти́рие, ско́рый наш помо́щниче,  
Зелене́цкий чудотво́рче!

### **Конда́к 3**

Си́лою благода́ти Бо́жией снабдева́емь, се́дмь ле́т  
со наста́вником твои́м пребы́л еси́, преподо́бне,  
и́же мно́гим полёзным тя́ научи́. Наипа́че же  
уча́ше боля́щих поско́ру Святы́х Та́ин  
сподобля́ти, зане́ по сме́рти то́й душе́, я́ко  
несу́щей свята́я, де́мони ника́коже мо́гут  
каса́ться, а́нгели же ю́ сретают с пе́снию:  
Аллилу́иа!

### **И́кос 3**

Име́ний не стяжа́в, стяжа́л еси́ му́дрость жи́зни  
по Бо́зе, преподо́бне Марти́рие, я́ко бо се́мя, в  
зе́млю вмета́емо, но́вы клáсы возвра́щает, та́ко и

поучения наставника твоего быша души твоей  
семенем жизни вечныя. Сего ради тя ублажаем:

Радуйся, послушанием украсивыйся;  
радуйся, постом истончивый плоти страстная.

Радуйся, препобеждавый сон молитвенным  
бдением; радуйся, трудом земледелия  
укрепивый силы своя.

Радуйся, послуживый больным во  
врачебнице; радуйся, омывавый струпы  
гнойныя и язвы неисцельныя.

Радуйся, поскорбевый с скорбящими;  
радуйся, немощных роптания кротце понесый.

Радуйся, заповедь Христову деянием  
совершивый; радуйся, милостиве, яко вечное  
помилование стяжал еси.

Радуйся, тако себе предуготовавый к  
пострижению иноческому.

Радуйся, Мартирие, скорый наш помощниче,  
Зеленецкий чудотворче!

#### **Кондак 4**

Буря греховная многи люди погуби. Обаче силою  
благодати Христовы мнози спасение улучают,  
живуще благочестне, монаси и мирстии. Кийждо  
приемлет, еже по мере сил обретает, ов о чадах

спасаётся, о́в же ино́честии прие́млет о́беты и Бо́гови денноно́щно поёт пе́снь серафимскую: Аллилу́иа!

#### И́кос 4

Слы́шав Иису́са Христа́, ре́кша о ино́честем житий: «моги́й вместити́, да вместит́», и зря́ себе́ к о́ному прикло́нна, усер́дно моли́л еси́, преподо́бне, наста́вника, да жела́ние твоё освятит́ и укрепит́ постриже́нием, е́же и получи́л еси́. Те́мже тебе́ вопие́м:

Ра́дуйся, я́ко остри́гл еси́ власы́ главы́ твоея́ в зна́мение мироотрече́ния; ра́дуйся, я́ко обле́клся еси́ в хито́н во́льныя нищеты́.

Ра́дуйся, прие́мый рясу́ а́ки оде́жду весе́лия; ра́дуйся, препоя́савый бедра́ свой я́ко си́лою и́стины.

Ра́дуйся, ма́нтиею, а́ки бронёю пра́вды, оде́явыйся; ра́дуйся, покрывы́й главу́ свою́ покрыва́лом смире́ния.

Ра́дуйся, с оде́янием санда́лий не ско́р бы́вый на творе́ние во́ли своея́; ра́дуйся, глаго́лом Бо́жиим, а́ки мечём воору́живыйся в всегда́шней моли́тве Иису́совой.

Ра́дуйся, крѣст, щитъ вѣры при́йм, с любóвию облобыза́вый и; ра́дуйся, свещу́ взѣм, свеще́ю благочѣстия явивыйся последи́.

Ра́дуйся, прия́тый в во́инства протѣву ми́ра, плóти и диáвола.

Ра́дуйся, Марти́рие, скóрый наш помóщниче, Зелене́цкий чудотво́рче!

### **Конда́к 5**

Боготѣ́чная звезда́ дрéвле приведе́ мудрецы́ востóчныя к я́слем Вифле́емским, иде́же ти́и обрето́ша Царя́ ца́рствующих и Го́спода господствую́щих. Та́ко и ты́, преподо́бне Марти́рие, пу́ть ино́ческаго жити́я приведе́ последи́ в селѣ́ния го́рняя, иде́же рождѣ́нному от Дѣ́вы вы́ну прино́сится спасѣ́нными пѣснь вели́кая и хвале́бная: Аллилу́иа!

### **И́кос 5**

Врагу́, прѣсно́ на пусты́нных муже́й страхова́нии мно́гими напа́дающе, жити́ем моли́твенным противуста́л еси́, преподо́бне, и жесто́ким страсте́й умерщвлѣ́нием. Мы́ же, чудя́щеся твоему́ терпѣ́нию бра́ни, от того́ воздвѣ́гнутыя, умилѣ́нно поѣм ти́ хвалы́:

Ра́дуйся, до́бре преуспе́вый в ино́ческих по́двизех; ра́дуйся, пу́стынна́го жи́тельства возже́лый зе́ло.

Ра́дуйся, моли́твою на си́е Бо́жия благосло́вения проси́вый; ра́дуйся, удо́стоивы́йся явле́ния преподо́бнаго Михаи́ла Кло́пскаго.

Ра́дуйся, я́ко то́й благосло́ви твое́ изволе́ние; ра́дуйся, за ше́стьдесят по́прищ от оби́тели нача́вый пу́стынное жи́тельство.

Ра́дуйся, я́ко ве́лию бра́нь воздвиго́ша проти́ву тя́ зде́ зли́и де́моны; ра́дуйся, я́ко мно́жицею во́плми во вре́мя полу́нощи устраша́ху тя́.

Ра́дуйся, избити мня́ще, ничто́же ти́ зло́ сотвори́ти можа́ху; ра́дуйся, я́ко прогоня́л еси́ я́ моли́твою, а́ки пла́менным мече́м.

Ра́дуйся, си́лою креста́ Христо́ва посрами́вый си́лу вра́жию.

Ра́дуйся, Марти́рие, ско́рый на́ш помо́щниче, Зеле́нецкий чудотво́рче!

### **Конда́к 6**

Пропове́дниче благоче́стия, егда́ узре́л еси́, преподо́бне Марти́рие, о́браз Влады́чицы на́шея Богоро́дицы в столпе́ о́гненне и све́тле в стране́

Тихфинстей, зело́ умили́лся еси́ Бо́жию к себе́ милосе́рдию. Егда́ же в град Смоле́нск богомоле́ния ра́ди вше́л еси́, яви́шася ти́ преподо́бнии Авра́мий и Ефре́м и па́ки пусты́нное ти́ прореко́ша жити́е, сла́дце воспе́л еси́: Аллилу́иа!

### И́кос 6

Воссия́ благода́ть Бо́жия в оби́тели Тихфинстей, егда́ та́мо пожи́л еси́ с ученико́м сво́им Авра́мием, и́же и сподо́бися зрети́ крестъ́ зве́зден, назнамену́ющ ме́сто твоея́ оби́тели. Те́мже ти́ рце́м та́ко:

Ра́дуйся, на Го́спода возложи́вый все́ свое́ упова́ние; ра́дуйся, ише́дый на поклонёние святы́м мо́щем преподо́бных Авра́мийа и Ефре́ма.

Ра́дуйся, преподо́бне, преподо́бных собесе́днице; ра́дуйся, незри́мый днесъ́ споспешни́че ко святы́м ме́стам шеству́ющим.

Ра́дуйся, прише́дый на поклонёние ико́не Богома́тери Тихфинстей; ра́дуйся, я́ко та́мо добродете́льным жити́ем просия́л еси́.

Ра́дуйся, ключехрани́телю, отверза́вый и затворя́вый двéри храмо́вныя; ра́дуйся, днесъ́

вводяй в врата́ Небѣсныя моли́твою за  
немо́щную бра́тию.

Ра́дуйся, просла́вивый прия́вшую тя оби́тель  
равноа́нгельным жити́ем; ра́дуйся, изше́дый из  
тоя на по́двиг устро́ения но́выя.

Ра́дуйся, возжегй́ свети́льник во спасѣ́ние  
немо́щным.

Ра́дуйся, Марти́рие, ско́рый наш помо́щниче,  
Зелене́цкий чудотво́рче!

### **Конда́к 7**

Хотя́й еди́н Бо́гови моли́тися и бы́ти в  
безмо́лвии, отше́л еси́, преподо́бне, в ме́сто, над  
ним же Авраа́мий крѣ́ст ви́де зве́зден, и обре́л  
еси́ то́е, я́ко о́стров зе́лен посреде́ во́д бла́тных,  
ле́с же, а́ки стра́ж но́щный, поко́й его́ от  
прише́ствия ми́рских люде́й храня́ше. Вельми́ ти  
любе́зна обре́тесе́ пусты́ня сия́ прегорча́йшая,  
ю́же ви́дящи, умилѣ́нно воспѣ́л еси́: Аллилу́иа!

### **И́кос 7**

Но́вая купе́ль Силоа́мская бы́сть ти́, преподо́бне,  
Зелене́цкая пу́стынь, в то́й бо от немо́щных и  
стра́стных естества́ очисти́л еси́ себе́ бде́нием и  
посто́м и де́ланием духо́вным, и уго́ден

Господевѣ явилъся еси, сего ради и мы тако  
ублажаемъ:

Радуйся, обрѣтѣи мѣсто, ти Богомъ на  
вселѣние уготованное; радуйся, не убоявѣйся  
пустыннаго одиночества.

Радуйся, памятовавѣи, яко с тобою бѣ присно  
Господь; радуйся, яко Илия на Кармиле, молился  
еси ту.

Радуйся, яко Иоаннъ в Иорданской пустыне  
постомъ украсился еси; радуйся, ревнителю  
преподобныхъ Онурѣя, Макарія и Антонія,  
великихъ отцевъ.

Радуйся, проразумевѣи абие бывшую кознь  
дѣвола; радуйся, предрекии привѣдшу тя  
мужевѣ Иосифу дщери смѣрть дѣволимъ  
ухищреніемъ бывшую.

Радуйся, открывѣи, яко утопшая лику  
мученичу причтѣся Божіею милостію; радуйся,  
вола погѣбша в вѣтвехъ дрѣвесныхъ дѣвольскимъ  
кознованіемъ объявивѣи томужде.

Радуйся, тако от унынія мужа благоговѣйна  
спасѣи.

Радуйся, Мартиріе, скорый нашъ помощниче,  
Зеленецкій чудотворче!

## Кондак 8

Странники и пришельцы есмь на земли сей, преподобне, присно ны враг искушает, страсти возмущая, уныние вселяя, и многи поставляет препоны текущим по пути в горний Иерусалим. Аще же что и благо сотворим ближнему, тщится, да погибнет мзда, скорбьми абие нам отмстити. Бог же сия терпит, якоже древле Йовле поругание, да вящшее даст утешение последи поющим: Аллилуиа!

## Икос 8

Всяк в житий крест скорбей и печалей, егоже кому даде Господь, преносит, и аще в уныние не впадет, последи сугубо прославляется. Тако и ты, отче, вся претерпев, милостей Господних сподобился еси, сего ради тя ублажаем:

Радуйся, изначала соградивый часовницу и малу хижину; радуйся, ту сладце деннонощно моливыйся Богу.

Радуйся, Христа ради претерпевый зной и мразы многие; радуйся, питавайся, яже точною ти приношаху окрестнии.

Радуйся, вскоре утешенный видением огненна столпа с рукою, искры разметающею;

ра́дуйся, я́ко сия́ зна́менаше оби́лие благода́ти,  
от тебе́ исходити иму́щия ко бра́тии.

Ра́дуйся, свети́льниче, егóже позна́ша вско́ре  
ве́рнии; ра́дуйся, я́ко не отгна́л еси́ жа́ждавших  
с тобо́ю пожи́ти.

Ра́дуйся, я́ко приима́л еси́ от ми́ра к тебе́  
притека́ющих; ра́дуйся, па́стырю словесных  
ове́ц.

Ра́дуйся, послу́живый немо́щному  
челове́честву до сконча́ния живота́.

Ра́дуйся, Марти́рие, ско́рый наш помо́щниче,  
Зелене́цкий чудотво́рче!

### **Конда́к 9**

Всего́ себе́ принёсл еси́ в же́ртву, Бо́гови  
уго́дную. Мно́гие труды́, ско́рби и печа́ли понёсл  
еси́, устра́яя оби́тель и служа́ще бра́тии, и́же от  
язв мирски́я суеты́ му́дре в чистоту́ жити́я  
богоуго́днаго влёкл еси́, слова́ и дея́ния  
моли́твою укрепля́яй. Два́ же хра́ма и ке́ллии  
соградил и оби́тель стено́ю древя́ною оградил  
еси́, да я́коже в вертогра́де цветы́ источа́ют  
благоуха́ния, ино́цы зде́ уго́дне Бо́гови пою́т:  
Аллилу́иа!

## И́кос 9

Ве́твьми дре́во благосенноли́ственное  
прикрыва́ет мно́гия, и ты́, преподо́бне, мно́гия  
прикры́л еси́ от наве́тов вра́жиих и мо́ря  
жите́йскаго бу́рь. Мно́зи бо к тебе́ притеко́ша во  
обитель Зеле́нецкую, ихже ра́ди игу́менства сан  
многопопечи́тельный и священство прия́л еси́ и  
в ца́рствующий гра́д потре́бных ра́ди обители  
пешешество́вал еси́. Сего́ ра́ди ублажа́ем тя́:

Ра́дуйся, свети́льниче, осия́вый те́мную  
страну́; ра́дуйся, создате́лю хра́мов, в нихже и́мя  
Бо́жие прославля́ется.

Ра́дуйся, а́ки сокрови́ще ве́лие внесы́й в о́ныя  
святы́я ико́ны, от настоя́теля ти́ пре́жде  
вда́нныя; ра́дуйся, постом, слеза́ми и моли́твою  
созда́вый основа́ние обители непоколеби́мое.

Ра́дуйся, благоче́стием привлеки́й мно́гие  
щедрода́тели; ра́дуйся, к тебе́ бо, я́ко пчела́ ко  
у́лю, приноша́ху боголю́бцы сокрови́ща своя́.

Ра́дуйся, ве́роваху бо, я́ко тако́ творя́ще,  
взаим даю́т Бо́гови; ра́дуйся, я́ко еди́н благи́й  
Фео́дор согради́ ти́ вся́ потре́бная.

Ра́дуйся, поуча́яй, я́ко обителей ле́пота  
моли́твою ино́ков стяжавáется; ра́дуйся, я́ко за

добро, ти данное, молился усердно сам и вся  
братия твоя.

Радуйся, образу истинного иноческого жития.

Радуйся, Мартирие, скорый наш помощник,  
Зеленецкий чудотворче!

### **Кондак 10**

Спасительныя милости сподобился еси,  
преподобне отче Мартирие: единожды по  
молитве мало уснувшу ти, узрел еси Матерь  
Божую. В девичем образе бе Пречистая,  
умиленна лицем и прекрасна, бровми черна. На  
главе быше златый венец, от камней  
многоценных светящий зело. Ты же, Ю узрев, с  
слезами умиления преклонився, воспел еси:  
Аллилуиа!

### **Икос 10**

Стена ти нерушимая бысть, подобне, икона  
Тихфинская, еюже благослови тя настоятель,  
егда в Зеленецкий оток отхождал еси. Егда же  
Пречистую зрети удостоился еси, абие  
невидимей бывшей, на икону сию возрел еси и  
познав еси, яко в подобии тоя иконы бе  
Владычица: яже помятующи, тако ти рцем:

Ра́дуйся, и́стинный Пречи́стия святы́х ико́н  
чти́телю; ра́дуйся, и́стиннаго святы́х ико́н  
почита́ния нау́чителю.

Ра́дуйся, Пречи́стия Влады́чицы ли́к, слеза́ми  
испо́лненный и прекра́сный ви́дети  
удосто́енный; ра́дуйся, я́ко келёйныя ико́ны  
твои́ и днёсь осе́няют гроб тво́й.

Ра́дуйся, я́ко покланя́ющесе́ им, че́сть не  
дре́ву, но на нём изображе́нным возда́ем;  
ра́дуйся, я́ко не дска́м и ва́пам, но напи́санному  
Божеству́ на них покло́нение прино́сим.

Ра́дуйся, я́ко ли́ки святы́х и тво́й лобыза́юще,  
а́ки но́зи ва́ша лобыза́ем; ра́дуйся, я́ко  
фимиа́мом моли́тву на́шу зна́менуем.

Ра́дуйся, свещи́ возжига́юще, о свёте, в нём  
же Бо́г живёт, па́мятуем; ра́дуйся, я́ко от ико́н  
твои́х исхо́дит си́ла целе́бная.

Ра́дуйся, я́ко возложе́нием их, ме́ртва  
воскреси́ Госпо́дь.

Ра́дуйся, Марти́рие, ско́рый на́ш помо́щниче,  
Зелене́цкий чудотво́рче!

## **Конда́к 11**

Пе́сни надгробны́я и послéднее целова́ние  
смени́ся пéнием хвале́бным ми́лости Бо́жией и

слезами радости, егда, в Москву ти шествующу, во Твери, у царя Симеона сына Иоанна воскресил еси молитвою и святых икон твоих возложение по силе благодати Христовы, ти данныя. Сего ради zelo возлюби Симеон обитель твою, преподобне, и три новы храмы ту согради, да о чудеси сем выну Богу возносится песнь хвалебная: Аллилуиа!

### Икос 11

Яко светильника тя благочестия почитающий царь Симеон много потребными обитель твою снабде. Егда же скончался еси, преподобне, чтый вельми память твою святитель Корнилий, Новуграду владыка мудрый, zelo возлюби и преукраси, идеже и место упокоения си избра. Яже помятующе и обитель твою ради веры и терпения украшену видящи, тако тебе вопием:

Радуйся, искателю царствия Божия, емуже вся земная приложися; радуйся, яко обитель твоя потребными не оскуде.

Радуйся, яко трем храмы, яко купель трем свещами осияся сия; радуйся, яко недужнии душею ту оздравляхуся.

Радуйся, яко царие и прости, богати и убозии, посещающе ю, во спасение назидахуся;

ра́дуйся, я́ко уме́ршаго о́трока в утеше́ние  
роди́телема воскресил еси́.

Ра́дуйся, я́ко те́м си́лу благода́ти Бо́жия явил  
еси́; ра́дуйся, науча́яй те́м, я́ко в Бо́же живо́т  
на́ш и сме́рть скончава́ются.

Ра́дуйся, пропове́дниче Бо́жия  
всемо́гущества; ра́дуйся, благода́ти сосу́де  
преиспо́лненный.

Ра́дуйся, от гроба́ твоего́ источа́яй  
многообра́зная исцелéния.

Ра́дуйся, Марти́рие, ско́рый на́ш помо́щниче,  
Зелене́цкий чудотво́рче!

### **Конда́к 12**

Благода́ти Бо́жией избра́нниче, преподо́бне о́тче  
на́ш Марти́рие, егда́ состаре́лся еси́ и оста́ви тя́  
кре́пость тво́я, са́м рука́ма свои́ма ме́сто  
упокоéния и гроб соде́лал еси́. Прови́дя же  
кончи́ну сво́ю, до́бре поуча́л еси́ бра́тию тво́ю,  
е́же жи́ти и досто́йно пе́ти вы́ну Бо́гови:  
Аллилу́иа!

### **И́кос 12**

Поём тво́я ми́лости и чуде́са, преподо́бне о́тче  
на́ш Марти́рие, вы́ну бо и по преста́влении  
твоём на́с не оставя́еши и моли́твами твои́ми у

Господа потрібная, яже к животу и благочестию, исходатайствуеши, егда ты с верою и любовью призываем, и молишия, во еже спастися всем. Сего ради от благодарных сердец ты вопием усердно:

Радуйся, молитвенниче наш усердный; радуйся, помощниче наш скорый.

Радуйся, мир всем православным пред кончиною твоєю завещавый; радуйся, о мире всего мира незримый ходатаю.

Радуйся, на суше и в мори от всех оставленным помощь подаваяй; радуйся, недугующих от смертнаго одра к жизни возвращаяй.

Радуйся, всех душевных и телесных недугов врачу; радуйся, от злых духов мучимых избавителю.

Радуйся, скорбных сердце незримое умиротворение; радуйся, покрове к тебе притекающих.

Радуйся, о спасении всех теплый молитвенниче.

Радуйся, Мартирие, скорый наш помощниче, Зеленецкий чудотворче!

## Кондак 13

О, преподобне и богоносне отче наш Мартирие. Приими малое со умилением тѣ приносимое нами моление сие, и со Пречистою Материю Господа и всеми святыми молися Господу Иисусу Христу, да избавит нас от всяких бед и скорбей, от враг видимых и невидимых, от напрасных смерти и будущих мук, и сподобит со избранными Его воспевати Троице Святей во веки: Аллилуиа!

Этот кондак читается трижды, затем икос 1-й и кондак 1-й.

## Молитва

О, пастырю добрый, наставниче наш, преподобне отче Мартирие! Услыши еже к тебе ныне приносимое моление наше. Вемы бо, яко духом с нами пребываеши. Ты убо, преподобне, яко имея дерзновение ко Владыце Иисусу Христу, Богу нашему, и к Пречистой Богоматери, буди ходатай и молитвенник теплый о обители сей, юже возградил еси, и о нас, недостойных рабах, живущих в ней, – еяже ты просветитель сый и начальник, богособранному твоему братству помощник и заступник присно являеши, – яко да твоим

предстательством и молитвами невредимы на месте сём пребудем: от бесов же и злых человек ненаветованны от всех бед и напастей свободни сохранимся. Всём же отовсюду приходящим во святую обитель твою, и молящимся тебе с верою, и поклоняющимся раце мощей твоих, о еже избавитися от всякия скорби, болезни и напасти, милостивне поспеши, — даровати же православным мир, тишину, благоденствие и изобилие плодов земных. И о всех нас тёплый предстатель ко Господу и помощник душам нашим буди, еже отпуститися нам согрешениям нашим и молитвами твоими, святе, избавитися нам вечнаго мучения и сподобитися Царствия со всеми святыми, да славу, благодарение и поклонение возсылаем Единому Богу, в Троице славному, Отцу и Сыну и Святому Духу, ныне и присно и во веки веков. Аминь.



ПОЛНЫЙ  
**АКАФИСТНИК**  
КАНОНИЧЕСКИЙ

АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ

І

НОВОЕ  
\* НЕБО